

續漢書辨疑  
三國志辨疑



天 德

德 風

風 雷

雷 風

風 雷



三  
國  
志  
辨  
疑

錢大昭  
撰

中  
華  
書  
局

### 三國志辨疑序

陳承祚三國志，前人所未有之例。懸諸日月而不刊者也。魏氏據中原日久，而晉承其禪。當時中原人士，知有魏，不知有蜀久矣。自承祚書出，始正三國之名。且先蜀而後吳，又于楊戲傳末載季漢輔臣贊妮妮數百言，所以尊蜀殊于魏吳也。存季漢之名者，明夫蜀之實漢也。習鑿齒作漢晉春秋，不過因其意而推闡之。而後之論史者，輒右習而左陳，毋乃好爲議論而未審乎？時勢之難易乎？夫晉之祖宗所北面而事者，魏也。蜀之滅，晉實爲之。吳蜀既亡，羣然一詞指爲僞朝，乃承祚不惟不僞之，且引魏以匹二國。其秉筆之公，視南董何多讓焉？而晉武帝不以爲忤，張茂先且欲以晉書付之。其君臣度量之宏，高出唐宋萬萬，豈非去古未遠，三代之直道猶存，故承祚得以行其志乎？厥後琅邪纂統，卽仿漢中承制之局。鑿齒建議，祚魏而承漢，直易易耳。考亭生於南宋，事勢與蜀漢相同，以蜀爲正，固其宜矣。然吾所以重承祚者，尤在敘事之可信。蓋史臣載筆，事久則議論易公。世近則見聞必確。三國介漢晉之間，首尾相涉，垂及百年。兩史有遠失者，往往賴此書正之。如郝、盧、華、歆，均爲御史大夫，而盧爲漢臣，歆爲魏臣。魏紀書歆不書盧，是也。漢獻紀書盧兼書歆，非也。吳志言劉熙作釋名，後漢書以爲劉珍作，亦陳是而范非也。蔚宗號稱良史，然去東京歲月遙遠，較之承祚，則傳聞之與親覩，固不可同年而語矣。若晉書修於唐初，時代益復邈隔，又雜出衆手，非專門之業，其罅漏百出，奚足怪哉？予性喜史學，馬班而外，卽推此書以爲過于范、歐、陽而

裴氏注遮羅遣佚，尤爲陳氏功臣。所恨意存涉獵，不能專力。予弟晦之，孜孜好古，實事求是，所得殊多于予。其用力精勤，雖近儒何昶瞻、陳少章，未能或之先也。鈔撮甫畢，屬予點次，嘉而序之。時丁巳歲冬日兄竹汀居士大昕書。

### 三國志辨疑自序

史有二體、紀傳、編年、是也。紀傳中有二體、陳氏三國志、李氏南北史之與諸史是也。諸史中、班書約而仍明、略而勿陋、敘事最爲肅括、蔚宗史才已不逮古、而自稱體大思精、自古未有者、蓋謝承、華嶠、司馬彪、諸書竝在范前、取資旣多、用功益密、又因而非創、易于措辭也。陳承祚之于三國、綱宇鼎立、地醜德齊、兼之互相詆毀、各自誇張、斯其載筆、誠難折中、又列國雖有史錄、多詳魏而略吳、華曹而陋蜀、其匯而修成一史者、承祚爲創、是以用力尤難、乃能彙實錄小說家之所言、有條不紊、類事無頗、宜乎時人稱其善敘事、有良史才、范曄等表稱辭多勸戒、明乎得失、有益風化、而夏侯湛、張華輩竝相推重也。裴世期鳩集羣籍、以注此書、其所徵引、于漢有華嶠、謝承、後漢書、司馬彪續漢書、張璠、袁彥伯、後漢紀、劉艾靈帝紀、獻帝紀、袁思光獻帝春秋、樂資山陽公載記、孔衍漢魏春秋、習鑿齒漢晉春秋、獻帝起居注、獻帝傳、于蜀有譙周蜀本紀、王隱蜀紀、孫盛蜀世譜、于魏有王沈魏書、吳人曹瞞傳、郭頒魏晉世語、孫盛魏氏春秋、魏世譜、魏世籍、魚豢魏略、陰澹魏紀、母邱儉志紀、魏武故事、魏名臣奏、于吳有張勃吳錄、胡沖吳歷、韋昭吳書、環濟吳紀、于晉有王隱、虞預、晉書、干寶晉紀、習鑿齒晉陽秋、孫盛晉陽秋、陸機晉惠帝起居注、又李軌秦始起居注、傅暢晉諸公贊、于地理有司馬彪九州春秋、荀綽九州紀、虞預會稽典錄、趙岐三輔決錄、摯虞三輔決錄注、常璩華陽國志、王範交廣二州春秋、王隱交廣記、左思蜀都賦、魏都賦、庾闡揚都賦、太康三年地

紀、襄陽記、于人物有皇甫謐帝王世紀、高士傳、逸士傳、列女傳、魏文帝列異傳、王粲英雄記、張隱文士傳、葛洪神仙傳、周斐汝南先賢傳、張方楚國先賢傳、陳壽益都耆舊傳、陳術益都耆舊雜記、蘇林陳留耆舊傳、虞溥江表傳、零陵先賢傳、先賢行狀、漢末名士傳、魏末傳、于官制有山濤啟事、無名氏晉百官名志、晉百官表褒賞令、于雜書有顧愷之啟蒙注、晉武帝中經簿、荀勗晉中經簿、張儼默記、張華博物志、東方朔神異記、楊孚異物志、干寶搜神記、傅休奕傳子、葛洪抱朴子、袁準袁子、劉向說苑、新序、衛恆四體書勢序、殷基通語、陸氏異林、應璩書林、虞喜志林、司馬彪戰略、應劭風俗通、徐衆三國評、孫綽評、蔣濟萬機論、孫盛異同評、異同雜記、魏文帝典論、決疑要注、于文章有龔虞文章志、荀勗文章敍錄、于別集有孔融、高貴鄉公、陳思王、植、嵇康、石崇、潘岳、諸葛亮、姚信、王朗、傅咸、張超等集、于家傳有王朗、傅暢、荀氏、廬江河氏、會稽邵氏等族、又有杜氏新書、山濤行狀、袁氏世紀、裴氏家記、陸氏世頌、陸氏祠堂像贊、于譜牒有孫氏、嵇氏、劉氏、王氏、諸葛氏、庾氏、阮氏、孔氏、陳氏、郭氏、崔氏諸譜、于別傳有濟北王志、鄭康成、荀彧、禰衡、邴原、吳質、劉廙、任嘏、孫資、王弼、嵇康、華陀、管輅、趙雲、費禕、虞翻、諸葛恪、荀勗、程曉、潘岳、潘尼、孫惠、顧譚、盧諶、鍾會、母張氏、陸機、陸雲、諸家、外此羣經傳注、倉雅訓詁、方言、士語、諸子百家之說、無與史事而引以詮釋字句者、又不下數十種、夫世期引據博洽、其才實能會通諸書、別成畦町、若依後世新唐書五代史之例、可自作一史、與承祚方軌竝駕、乃不自爲而爲之注者、謙也、竊嘗論之、注史與注經不同、注經以明理爲宗、理寓于訓詁、訓詁明而理自見、注史以達事爲主、事不明、訓詁雖精無益也、嘗怪服虔、應劭、之于漢書、裴駰

徐廣之于史記。其時去古未遠。稗官載記碑刻尙多。不能會而通之。攷異質疑。而徒淺淺于訓詁。豈若世期之博引載籍。增廣異聞。是是非非。使天下後世讀者昭然共見乎。予舊于兩漢書有辨疑四十四卷。于地理官制頗有所得。名儒碩士。時或許之。近日復于三國志輯錄得三卷。仍仿漢書辨疑例。不敢立議論。以測古今。不敢妄褒貶。以騁詞辨。而其詳略不能與漢書盡同者。蓋史事藉注證而申。兩漢之注簡。簡則易滋疏略。三國之注博。博則疑義鮮存。有無待辨證而明焉者也。雖然。校書如掃落葉。隨掃隨積。以予之見聞有限。無論志中罅隙更俟補苴。卽拙著內亦豈無紕繆待指者。漢書刊誤所望吳斗南爲之補遺云。乾隆五十八年六月嘉定錢大昭書于濟南客舍。

# 三國志辨疑卷一

嘉定錢大昭撰

魏

武帝紀

漢相國參之後。按漢郃陽令曹全碑。以曹參爲出自曹叔振鐸。以國爲氏。魏武作家傳。自云曹叔振鐸之後。故陳思王作武帝誄云。於穆武王。冒稷嗣周。魏武與曹參同是沛人。其爲參後似無疑矣。然洪适所載費亭侯曹騰碑又云。曹氏族出自邾。則與王沈魏書所云以姓爲氏之說同矣。

初平二年。東郡王肱不能禦。按東郡下當有太守二字。

袁紹因表太祖爲東郡太守。治東武陽。按東郡本治濮陽。曹公改治。故特書之。臧洪爲東郡太守。亦治東武陽。

三年。司徒王允與李布共殺卓。李當作呂。

興平二年。天子拜太祖兗州牧。按初平三年。鮑信與州吏萬潛等至東郡迎太祖領兗州牧。蓋權領之耳。至是爲眞。

建安元年。張濟死。從子繡領其衆。張繡傳。繡驍騎將軍濟族子。

四年遣劉岱王忠擊之。按此沛國劉岱亦字公山。非劉繇兄也。東萊劉岱卒于建安三年。五年紹騎將文醜與劉備將五六千騎前後至。諸將擊破之。斬醜良。按斬顏良事在上文。此當云斬醜不當及良。因下有醜良二字而誤。

十六年遂與韓遂楊秋李靖成宜等叛。按下文云斬成宜李堪等。馬超傳亦作李堪。則靖字誤也。

遣信求割河以西請和。信謂使者也。史記韓世家陳軫說楚王發信臣多其車重其幣。司馬相如諭巴蜀檄。故遣信使曉諭百姓。

公與遂父同歲孝廉。同歲即今所謂同年也。

十九年但更事多耳。注使行太常事大司農安陽侯王邑。按策命魏公注亦引獻帝起居注作安陽亭侯。此注疑脫亭字。

二十三年代郡上谷烏丸無臣氏等叛。無臣氏疑即能臣氏。烏丸傳但云代郡不言上谷。疑衍上谷二字。

二十四年以夫人卞氏爲皇后。按是時太祖爲魏王。當作王后。文帝紀云太祖崩。嗣位爲丞相魏王。尊王后爲王太后。是其證也。

文帝紀

文皇帝諱丕。按文帝爲高祖。明帝爲烈祖。見于景初詔中。承祚于文明二紀俱削而不書。蓋德不相副。

且功無可錄，何以言祖？此史筆之謹嚴也。

皆各遣使奉獻。注：少府謝奐、萬潛、萬潛疑卽萬潛，見武帝紀。

以肅承天命。注：給事黃門侍郎王愷、董遇等言。董遇字季直，見王朗傳。王愷未詳。

注：日載東絕火光。按說文：囂，獄之兩囂也。在廷東，从白。徐鍇曰：以言辭治獄，故从白。識文以白爲日，此

俗儒之誤。

注：五八四十黃氣受真人出。言漢祚四百餘年運數已絕，當有黃氣受之。

注：鬼在山，禾女連。古魏字作巍，故有是說也。說文：魏从嵬，委聲。漢人作魏字，或姓或郡，皆有山字，見于

洪氏隸釋者，不可勝計。

注：給事博士騎都尉蘇林、董巴等。蘇林見劉劭傳。注：

注：是芝所取中黃運期姓緯之識。緯，當作諱。

注：侍御史鄭渾、羊祕、鮑勛、武周等。渾勛自有傳。武周字伯南，見胡質傳。注：羊祕未聞。

黃初四年，月犯心中央大星。注：故分命猛將三道竝征。按三道謂曹休、張遼、臧霸出洞口，曹仁出濡須。

曹真、夏侯尚、張郃、徐晃、關南郡也。又云：今征東諸軍，謂征東大將軍曹仁。又云：大司馬據守濡須，謂曹

仁也。又云：中軍征南攻圍江陵，謂中軍大將軍曹真。征南大將軍夏侯尚也。

行幸許昌宮。注：賜山陽公夫人湯沐邑。公女曼爲長樂郡公主。按是時獻帝爲郡公，其女安得爲郡主？且

郡亦無長樂之名。此郡字疑或鄉或亭之譌。

明帝紀

故未建爲嗣。注。有意欲以他姬子京兆王爲嗣。京兆王禮、徐姬之子也。

撫軍大將軍司馬宣王爲驃騎大將軍。按太和元年詔驃騎將軍司馬宣王討之。四年驃騎將軍司馬

宣王爲大將軍。驃騎下無大字。疑衍文。

太和元年秋八月。夕月于西郊。據晉志八月下應有己丑二字。

三年。繁陽王穆薨。按明帝子有清河王問、繁陽王穆、安平哀王殷。追封雖曰早薨。然既有封地。自可于

王公傳中備書。今傳中但載武文不及明帝者。以宮省事祕。莫知其所由來。亦猶班史于孝惠後宮子

三王三侯不書于表傳中也。

四年十一月。太白犯歲星。脫書日。晉志作壬戌。

六年春二月。按晉書天文志。太和六年正月戊辰朔。日有蝕之。見吳廡。又正始元年七月戊申朔。三年

四月戊戌朔。六年四月壬子朔。十月戊申朔。九年正月乙未朔。嘉平元年二月己未朔。甘露四年七月

戊子朔。景元三年十一月己亥朔。晉志竝云日有蝕之。史皆失書。

青龍元年詔祀故車騎將軍程昱。按車騎將軍是程昱追贈之官。生時止爲衛尉。

慎勿越塞過句注也。按句注。山名。在今代州西二十里。

二年葬以漢禮。注：使使持節行司徒太常和洽弔祭。又使持節行大司空大司農崔林監護喪事。按是時不遣司徒董昭、司空陳羣自往山陽，而但以太常大司農行其禮，未免有名無實矣。司空上大字疑衍。

景初元年，有司奏帝制作興治，爲魏烈祖，樂用章武之舞，三祖之廟，萬世不毀。按禮祖有功而宗有德，當于身後定之，詎有生爲魏主而有司遂豫擬爲烈祖邪？陳矯、衛臻之徒不學無識，乃至于此。

營洛陽南委粟山爲園丘。注：四百餘年廢無禘祀。晉書禮志作禘禮。

二年，帝曰：司馬懿臨危制變，按司馬懿三字當是後人追改。壽爲晉臣，無不避諱之理。若以爲史述帝語，不得不書其名，則如齊王芳詔曰：太尉體道正直，何獨非帝語而稱其官乎？以此知壽之本文亦是稱其官也。

齊王芳紀

其以太尉爲太傅。按太尉，卽司馬宣王也。因詔書中不便稱爲司馬宣王，故不書姓名。他如甘露五年，使使持節行中護軍中壘將軍司馬炎北迎常道鄉公璜。咸熙元年，命中撫軍司馬炎副貳相國事。又以中撫軍司馬炎爲撫軍大將軍，又命撫軍大將軍新昌鄉侯炎爲晉世子。又晉太子炎紹封襲位，竝是後人追改。

以征南將軍黃權爲車騎將軍。按車騎將軍特書除授，始見于此，而前此曹仁、張郃，不知何以不書。

正始四年立皇后甄氏。按齊王后甄氏及高貴鄉公后卞氏陳留王后卞氏竝位列中宮母儀天下自應作傳然三少帝歷年未久享位不終皇后亦無事可紀故止于文昭甄后武宣卞后傳末附見之

五月朔日有食之既晉志作五月丁丑朔

五年四月朔日有食之脫丙辰二字晉志作景辰避諱

六年以右光祿大夫孫資爲衛將軍按衛將軍特書除授始見于此是後惟胡遵爲衛將軍書之于紀

此外如司馬景王文王及司馬望竝爲此官史不備載

八年二月朔日有蝕之當據晉志補庚午二字

散騎常侍諫議大夫孔宴又奏曰按孔宴又當作孔乂倉慈傳注引孔氏譜云孔乂字元儻爲散騎常侍上疏規諫是紀中衍宴字也下文云宴又咸因闕以進規諫蓋合上文何晏所奏言之

嘉平三年以征南將軍王昶爲征南大將軍按征南將軍特書除授唯見于此而前此之夏侯尚何以不書

高貴鄉公紀

正元五年正月朔日有食之當據晉志補乙酉

散騎常侍王業注國語曰國語誤疑世語通語之譌晉襄陽令郭頒作魏晉世語吳零陵太守殷基作通語

陳留王紀

景元二年五月初，日有食之。晉志丁未朔。

四年十二月癸丑，特赦益州士民，復除租賦之半。五年乙卯，以征西將軍鄧艾爲太尉。按復除租賦之

半五年者，謂五歲之內，每歲租賦盡復除其半也。癸丑與乙卯僅隔一日，汲古閣本以五年提行，非也。

景元無五年。文獻通考國用門引此條不連五年二字，知宋本已誤。

后妃傳

及踐阼，尊后曰皇太后，稱永壽宮。按文帝紀注：延康元年十一月，已有永壽少府毛宗，則永壽宮之稱

不自文帝踐阼始矣。

明帝乃追諡太后祖父廣曰開陽恭侯，父遠曰敬侯，祖母周封陽都君及恭侯夫人，皆贈印綬。按太后

當作太皇太后，恭侯夫人當作敬侯夫人，又失書其姓。卞后之祖父與父明帝既追封爲縣侯，則后之

祖母與母竝當追封爲縣君。況上云祖母卽恭侯夫人矣，不應重複言之。其爲敬侯之誤無疑。

子暉嗣。注：時帝信巫女用水方。巫女，卽青龍三年壽春農民妻也。

明悼毛皇后，河內人也。按明悼毛皇后，明元郭皇后，皆書郡不書縣，非史例也。

董卓傳

中常侍段珪等，李賢曰：山陽公載記，段字作殷。

用其所舉韓馥、劉岱、孔伷、張資、張邈等。按張資、范書卓傳及吳志孫破虜傳竝作張咨。李賢曰：獻帝春  
秋咨作資。

主簿田景、前趨卓尸。田景，范書作田儀。李賢曰：九州春秋儀字作景。  
相攻擊連月。注：天子使左中郎將李固持節拜催爲大司馬。范書卓傳注引作李國。  
汜爲其將五習所襲。後漢書作伍習。五伍古字通。左氏傳伍參，漢書人表作五參。

袁紹傳

稍遷中軍校尉。中軍，范書作佐軍。李賢引山陽公載記亦作中軍。  
乃讓紹。注：雖有張楊於浮羅新附。張楊傳作於夫羅。浮夫聲相近。

備奔紹。注：獎，蹶威柄。文選同。李善曰：蹶，成也。范書蹶作就。  
注：故復援旌擐甲。范書旌作旂，旂卽旌字。下文注云：何塞青蠅飛于干旂。范書作竿旌。

尙自將兵助譚與太祖相拒于黎陽。自二月至九月大戰城下。譚尙敗走入城守。太祖將圍之。乃夜遁。

按范書作自九月至明年二月。攷武帝紀建安七月譚自號車騎將軍屯黎陽。秋九月公征之。八年春  
三月拔其郭大破之。譚尙夜遁。據此則范史爲是。此傳誤也。

至黎陽。注：未若文公之忿曹。文公當從范書作太公。  
注：當唯義是務。義，范書作曹爲是。

注、乃議曲直之計。計當從范書作評。

注、復能戮力爲君之役哉。爲君、范書作仁君。當從之。

注、季友歎歎而行鉞叔之鳩。鉞叔、左氏傳作鉞季。范書作叔牙之誅。

注、昔先王廢細將軍以續賢兄。先王當作先公。

尚還生濫口。范書作藍口。李賢曰：相州安陽縣界有藍嵯山，與鄴相近。蓋藍山之口。

袁術傳

皆服綺縠，餘梁肉。注、司隸馮方女。按馮方疑卽馮芳。中平五年初置西園八校尉，以芳爲助軍右校尉。

見靈帝本紀及袁紹傳注。此作馮方疑誤。

注、諸婦妒其寵。語之曰：語當從後漢書術傳作給。依說文解字當作詒。詒，相欺詒也。列子黃帝篇：既而

狎侮欺詒。郭璞注：方言云：汝南人呼欺爲譴詆。亦曰詒。史記高祖本紀：高祖爲亭長，素易諸吏，乃給爲

謁。應劭曰：給，欺也。音殆。蓋借用絲勞卽給之給耳。

奔其部曲雷薄、陳蘭、于潛山。陳蘭、范書術傳作陳簡。

劉表傳

少知名。號八俊。注、公褚恭。後漢書黨錮傳作公緒恭。李賢曰：公緒，姓也。此作公褚誤。廣韻：一東作山陽

公褚恭，亦誤。